



Los Papas Heëlebaan

Los Papas Nujsbreef - Oehtgaaf 6, joargank 2012.

Leef Vasteloavendsvrung!

De jònge va Los Papas wille ug mit dizze nujsbreef u bietje trük loate kiekke.

Oos Fienie hat òs wèr vuëraaf in un geweldige kondiesie gebrag vuër u ònvergeëtelik sezoehn. Minnige oavend òp d'r donderdig hant vieër getreend. En mèr ummer òpnujts en wèr òpnujts en wèr òpnujts ... Dat woar neet alling vuër die auw rotte va Los Papas, mer òg vuër òzze nujje Los Papasmiensj Jack un zjwoar òpgaaf. Vieër mage noe waal zage: vieër woare in un groeëte vorm en vieër veulde òs wie jong vuëlens in un frisje weij mit good aafgerigde boddies ... D'r woare gelukkig ging blessures die òs hant gehinderd beij de òptreënes.

Wat hant vieër wèr, wie vanouds, genoate i de bejaardehoezer en òp de 55-plus-zittinge. Minnige mân of vrouw va diek i de auwere leëftied, hat mitgehald òp de bühne. En minnige kieër mooste de flesje, riekelik gevuld mit zuurstof, oehtkoms geëve. Zoewaal de auwer lÿj es òg ut personeel woare onger de indruk va oos poaldans-ekt of van oos sjtrakke boddies in de Garde-peksjkes.

De dameszittinge woare òg super. Va Berg aa de Maas bis Wielder en va Lindeheuvel bis Monde Verde. Uëveral zint vieër mit oape erm òntvange. Vieër houwe zelfs de ieër um mit Julianne Hiawatha u ongeròs ongerhoad te han gehat.

Dan de sjoëele, die mage vieër zieëker neet vergeëte. Doa doog jieëkerinne good mit. Doa woar good te zieë, woeë vieër woare. Dat ut rigtige vasteloavendsblood neet alling beij de groeëte miensje sjtreumt, mer òg beij de kinger vanaaf viehf!

Dit joar sjmakde vieër ut genoege um òp Vetdonnesjdig noa Oake te mage goa. Noe nog zint d'r vöel verkleijde auwwiever die mit u jònk hertje rònklope, òpgesjpanne middels oos button.

En ut is eg woar, vieër hant ut Sjtadhoehs in oos sjtad Heële wèr òp d'r kop gezat. En dat mit oos nuj ekt en mit oos noe al uëveral bekinde òpmarsj: "Hello!" Doe barside ut Sjtadhoehs bouw oeht zien voge. Gelukkig is te zage dat vieër i Heële eg ervaring hant mit sjeure en basjte i de pielare. Ozze Burgervadder wit doa gans good road mit. Ozze sjtolse Hoeëglustigheed Sjtadsprins Lars I hat zelfs vuër un nujjigheed gezurgd.

Los Papa Tibert hat mit zien ganse famielje de sje-vakans mit inne daag versjoave um òp dizze Sjlüeteluëverdraag d'rbeij te kinne zieë. De angere jònge va Los Paaps danke doavuër zien vrouw Femke en zien kinger. Mer vieër sjpreëke de hoop oeht dat dit neet de letste kieër hoof te zieë.

Oos vasteloavendsjpulle zint beij dit sjrieëve wèr trük i de kas, de ròw is wèr doa, mer in oos gedagte zint vieër alwèr nuj dinger aan ut oehtprakkezeëre vuër ut nieëkste sezoehn.

Leef luij, de jònge va Los Papas wunsje ug alle goods tòw. En ongetwiefeld zient vieër òs d'r kommende tied nog waal uns urges.

Bis da!

De grus van àl die jònge va Los Papas,

Ger, Hans, Henk, Jack, Jo, Jo, Louis, Tibert, Walter.

www.lospapas.nl